



Broj: 01,02,03,03/11-05-1-782/18

Sarajevo, 26. 6. 2018.

BOSNA I HERCEGOVINA
PARLAMENTARNA SKUPŠTINA BOSNE I HERCEGOVIN.
SARAJEVO

PRIMLJENO 21-08-2018

| Organizaciona jedinica | Klasifikaciona oznaka | Redni broj | Broj priloga |
|------------------------|-----------------------|------------|--------------|
| | | | |

Izvjestaj

s 19. sastanka Asocijacije evropskih senata, Bukurešt, 14 - 16. juni 2018.

Predsjedavajući Doma naroda Parlamentarne skupštine Bosne i Hercegovine Ognjen Tadić i sekretar Doma naroda Bojan Ninković učestvovali su na 19. sastanku Asocijacije evropskih senata, koji je u organizaciji Senata Rumunije održan u Bukureštu od 14. do 16. juna 2018. godine.

Na sastanku su učestvovali predsjednici senata iz Austrije, Bosne i Hercegovine, Češke Republike, Francuske, Irske, Italije, Luksemburga, Holandije, Poljske, Rumunije, Slovenije, Španije, Švicarske i Velike Britanije. Glavna tema rasprave na sastanku bila je o ulozi senata u odnosu na sadašnje izazove ekonomskoj, socijalnoj i teritorijalnoj koheziji u Evropi.

Sastanak u Bukureštu otvorio je predsjednik Senata Rumunije Calin Popescu-Tariceanu, koji je u svom obraćanju istakao da postojanje evropskih senata doprinosi aktuelnoj borbi za evropski identitet, solidarnost, koheziju i ispunjavanje evropskih standarda. Prema riječima predsjednika Senata Rumunije, suočavanje sa svim ovim izazovima, kao i borba protiv disfunkcionalnosti Evropske unije bit će ključna tema rumunskog predsjedavanja Evropskom unijom u prvih šest mjeseci 2019. godine.

Tokom sastanka o ulozi senata u odnosu na sadašnje izazove ekonomskoj, socijalnoj i teritorijalnoj koheziji u Evropi govorili su svi prisutni predsjednici evropskih senata.

Obraćajući se predsjednicima evropskih senata kao i drugim učesnicima koje su činili predstavnici gornjih domova evropskih parlamenata, predsjedavajući Ognjen Tadić istakao je bitnu ulogu Doma naroda Parlamentarne skupštine BiH u ostvarivanju unutrašnje kohezije u složenim političkim uslovima u Bosni i Hercegovini.

Ocjenjujući da se Bosna i Hercegovina suočava s brojnim izazovima i opasnostima, poput loših odnosa između Istoka i Zapada, koji kod nas izgledaju kao hladni rat; problema na evropskom putu, koji nastaju kako zbog unutrašnjih odnosa tako i zbog teških i često kontradiktornih uslova Evropske unije; problema sa izbjeglicama i migrantskom krizom, kao i problema s ekonomijom, nezaposlenošću i korupcijom, predsjedavajući Ognjen Tadić naglasio je da se dvodomni parlamentarni sistem lakše suočava sa svim ovim izazovima.

Prema riječima predsjedavajućeg Ognjena Tadića, u politici koja je sazdana od interesa i vrijednosti, zemlje koje imaju senat mogu ga koristiti kao dom u kome se brane vrijednosti, za

razliku od predstavničkih domova u kojima preovladava odbrana interesa, često na beskrupulozan način. Ukazujući na činjenicu da je Dom naroda jedan od dva potpuno ravnopravna doma u Parlamentarnoj skupštini BiH, predsjedavajući Doma naroda rekao je da u Bosni i Hercegovini postoje politički uslovi za uspostavljanje ravnoteže između interesa i vrijednosti, što je, kako je zaključio, jedan od osnovnih načina za uspostavljanje unutrašnje kohezije u svakoj zemlji.

Zahvaljujući se rumunskim domaćinima na odličnoj organizaciji sastanka najviših predstavnika evropskih senata, predsjedavajući Ognjen Tadić preliminarno je predložio da 2020. godine, povodom 25. godišnjice potpisivanja Dejtonskog mirovnog sporazuma, Dom naroda Parlamentarne skupštine BiH bude domaćin sastanka Asocijacije evropskih senata.

Predsjednici senata jednoglasno su odlučili da Senat Irske postane 16. član Asocijacije evropskih senata.

Na marginama 19. sastanka Asocijacije evropskih senata, predsjedavajući Doma naroda Parlamentarne skupštine Bosne i Hercegovine Ognjen Tadić susreo se s predsjednikom Senata Irske Denisom O' Donovanom, s kojim je razgovarao o mogućnostima ubrzanja procesa evropskih integracija BiH.

Susret dvojice predsjedavajućih predstavlja nastavak bilateralne saradnje dvije državne zakonodavne institucije, započet posjetom predsjednika Senata Irske Parlamentarnoj skupštini BiH sredinom marta ove godine. Kako je bilo dogovoreno na sastanku u Sarajevu, predsjedavajući Ognjen Tadić uručio je predsjedniku O' Donovanu detaljnu informaciju o procesu evropskih integracija Bosne i Hercegovine, uz molbu da svojim autoritetom podrži našu zemlju na evropskom putu i pruži svu potrebnu pomoć kako bi Bosna i Hercegovina što brže dobila kandidatski status za članstvo u Evropskoj uniji.

Predsjednik Senata Irske još jednom je naglasio da će njegova zemlja pružiti punu podršku Bosni i Hercegovini u procesu evropskih integracija, te najavio da će informaciju o procesu evropskih integracija Bosne i Hercegovine predati Vladi i ministru vanjskih poslova Irske s ciljem da na svim sastancima čelnika Evropske unije lobiraju za našu zemlju.

Zahvaljujući se predsjedniku irskog senata na podršci, predsjedavajući Ognjen Tadić pozdravio je današnju odluku Asocijacije evropskih senata da Senat Irske primi u punopravno članstvo ove asocijacije.

Izveštaj pripremila
Šefica Odjela za protokol
Jadranka Radović



Izveštaj odobrio
Predsjedavajući Doma naroda
Parlamentarne skupštine BiH

Ognjen Tadić



Dostaviti:

- Kolegiju Doma naroda Parlamentarne skupštine BiH
- Kolegiju Predstavničkog doma Parlamentarne skupštine BiH
- Kolegiju Sekretarijata Parlamentarne skupštine BiH
- Komisiji za vanjske poslove Predstavničkog doma
- Komisiji za vanjsku i trgovinsku politiku, carine, saobraćaj i komunikacije Doma naroda
- Sektoru za odnose s javnošću
- a/a